

每週經課朗誦經文(巴克禮漢羅/教羅)2013/08/04

共同經課 - 1 何西亞書十一章一節~十一節

1 以色列做 gín-ná ê 時，我疼伊；koh 召我 ê kiáⁿ 出埃及地。2 Ná 叫 in，in ná 走開，獻祭 tī chiah-ê Pa-lèk，燒香 tī 偶像。3 我教 Í-hoat-liân 學行，牽伊 ê 手；總是 in m̄ 知我醫好 in。4 我用慈惠 ê 索 kap 仁愛 ê 帶牽 in；我款待 in 親像 tùi in ê 領頸 tháu 開 in ê 擔 ê，用糧草 hē tī in 面前。5 伊無 koh tò 去埃及地；亞述 beh 做伊 ê 王，因為伊 m̄ 肯倒 tng。6 刀劍 beh 到伊 ê 城，毀壞 in ê 門拱；因為 in ê 計謀吞滅。7 我 ê 百姓決意 beh 背我；雖然有人叫 in 歸向至高 ê，總是無一個尊重祂。8 Í-hoat-liân ah，我 tháí-thó 會棄 sak 你？以色列 ah，我 tháí-thó 會將你交 hō 人？我 tháí-thó 會 hō 你親像 Ap-má？tháí-thó 會款待你做 Sé-phian？我回心轉意，我慈愛 ê 心真熱。9 我無 beh 發出我猛烈 ê 受氣；也無 koh 毀滅 Í-hoat-liân；因為我是上帝，m̄ 是世間人，是 tī lín 中間 ê 聖 ê；我無 beh tī 受氣中臨到 lín。10 耶和華 beh 親像獅 teh 哮；in beh tè 祂來行；祂哮 ê 時，hiah-ê kiáⁿ 就 ngiáuh-ngiáuh-chhoah，tùi 西方趕緊來。11 In beh ngiáuh-ngiáuh-chhoah，親像雀鳥 á，tùi 埃及緊緊來；koh 親像鴿 á tùi 亞述地到；我 beh hō in khiā 起家己 ê 厝；這是耶和華講 ê。

共同經課 - 2 詩篇一百零七篇一節~九節，四十三節

1 Lín tiòh 感謝耶和華，因為伊是好，因為伊 ê 慈愛永永 tī-teh。2 耶和華所救贖 ê tiòh 講這話，就是伊 tùi 對敵手中所救贖 ê；3 Tùi tak 國，tùi 東 tùi 西，tùi 南 tùi pak，所聚集 ê lóng tiòh án-ni 講。4 In tī 曠野拋荒 ê 路漂流，Chhē 無城 thang khiā 起。5 也 iau，也嘴乾，In ê 心神暈去。6 In 就 tī 苦難中哀求耶和華；伊 tùi in ê 患難中拯救 in。7 Koh choā in 行直 ê 路，Hō in 去到 thang khiā 起 ê 城。8 為 tiòh 耶和華 ê 慈愛 kap 祂對世間人所行 ê 奇事，願人 lóng o-ló 祂。9 因為伊 hō 迫切欣慕 ê 心得 tiòh 知足；Hō iau 餓 ê 心得 tiòh 好物到飽。43 見若有智慧 ê 人 beh 關心 chiah-ê tai-chi，亦 beh siàu 念耶和華 ê 慈愛。

共同經課 - 3 歌羅西書三章一節~十一節

1 所以 lín 若 bat kap 基督同 koh 活，就 tiòh 求 tī 頂面 ê 事；基督 tī hia，坐 tī 上帝 ê 大 pèng。2 Tiòh 致意頂面 ê 事，m̄-thang 致意地上 ê 事。3 因為 lín bat 死，也 lín ê 活命 kap 基督 saⁿ-kap khng tī 上帝。4 基督是咱 ê 活命；到伊顯明 ê 時，lín 也 beh saⁿ-kap 顯明 tī 榮光 ê 中央。5 所以 lín tiòh phah 死 lín tī 地裡 ê 百體，就是姦淫、污穢、邪 ê 心情、pháiⁿ ê 私慾，kap 貪心就是拜偶像；6 因為 tùi chiah-ê 事，上帝 ê 受氣臨到悖逆 ê 人。7 Lín 活 tī in 中間 ê 時，也 bat 行 tī chiah-ê。8 但是 chit-tiáp lín 也 tiòh 除去 chiah-ê 一切 ê 事，就是怨恨、受氣、惡毒、毀謗，kap 嘴內見笑 ê 話。9 莫得講白賊相騙，因為 lín 已經 thng 去舊 ê 人 kap 伊 ê 行做，10 也有穿新 ê 人，就是日日換新，到得 tiòh 知識，照創造伊 ê 像。11 其中無有分別希利尼、猶太，割禮 ê、無割禮 ê，化外 ê 人、Se-kó-thê 人，做奴僕 ê、自由 ê，獨獨基督是萬有，koh tī 萬有中。

共同經課 - 4 路加福音十二章十三節~二十一節

13 眾人中有一人 kā 伊講，先生 ah，請你 kah 我 ê 兄弟 kap 我分祖業。14 但是耶穌 kā 伊講，你 chit-ê 人 ah，chī-chūi 設立我做 lín ê 審判官，á 是做分家業 ê mah？15 就對眾人講，Tiòh 謹慎，約束家己，lóng 無貪心；因為人 ê 活命不在伊所積聚 ê 豐盛。16 就用譬喻對 in 講，有一個富人伊 ê 田園真好收。17 伊想來想去講，我無所在 thang 囤我 ê 土產，taⁿ beh 怎樣？18 Koh 講，我 beh án-ni 做，beh 拆我 ê 粟倉，起 khah 大 ê；就我 ê 五穀 kap 財物 lóng beh 囤 tī hia；19 也 beh kā 我 ê 靈魂講，靈魂 ah，你有 choē-choē 財物積聚做 choē-choē 年 ê 路用，thang 清閒、lim 食、快樂。20 但是上帝 kā 伊講，戇人 ah，今暝 beh 對你討你 ê 靈魂；就你所備辦 ê beh 歸甚麼人 ah？21 見若為 tiòh 家己積聚財寶，tī 上帝 ê 面前無好額 ê，也是 án-ni。